

RIJEČ REDAKCIJE

Povodom 25-te godišnjice I zasjedanja ZAVNOBiH-a, u Sarajevu je od 18. do 20. novembra održan naučni skup »Istorijske pretpostavke republike Bosne i Hercegovine«. Pored Instituta za istoriju radničkog pokreta, u organizovanju ovog naučnog skupa učestvovali su: Akademija nauka i umjetnosti Bosne i Hercegovine, Društvo istoričara Bosne i Hercegovine, Katedra za istoriju Filozofskog fakulteta, Katedra državnog i međunarodnog prava Pravnog fakulteta, Katedra za političke nauke Fakulteta političkih nauka, Skupština SR BiH i CK SK BiH. Pomenute ustanove i organizacije delegirale su svoje predstavnike u Organizacioni odbor, koji su sačinjavali: Predsjednik odbora Enver Redžić, direktor Instituta; članovi odbora: prof. Anto Babić, prof. dr Hamdija Kapidžić, prof. dr Ferdo Hauptman, prof. dr Hamdija Čemerlić, Nedim Šarac — viši predavač, Hasan Grabčanović — predsjednik Prosvjetno-kulturnog vijeća Skupštine SR BiH, Hamdija Pozderac — član Izvršnog komiteta CK SK BiH i sekretar odbora, Veselin Đuretić, asistent u Institutu za istoriju radničkog pokreta.

Naučnom skupu je prisustvovalo oko 80 istoričara i više predstavnika političkog i kulturnog života, među kojima predsjednik CK SK BiH Cvijetin Mijatović, predsjednik Skupštine SR BiH Džemal Bijedić, predsjednik Izvršnog vijeća Skupštine SR BiH Branko Mikulić, predsjednik Republičkog vijeća sindikata BiH Ivo Jerkić, sekretar Izvršnog komiteta CK SK BiH Danilo Bilanović, predsjednik Akademije nauka i umjetnosti BiH prof. dr Branislav Đurđev, član Srpske akademije nauka prof. dr Vaso Čubrilović, članovi Savjeta federacije: Uglješa Danilović, Vlajko Begović i Nisim Albahari, potpredsjednik Izvršnog vijeća Todo Kurtović, član Izvršnog vijeća Osman Đikić, predsjednik Republičkog savjeta za nauku dr Sida Marjanović, predstavnik Instituta za izučavanje radničkog pokreta u Beogradu Pero Morača, direktor Instituta za istoriju radničkog pokreta Srbije dr Bogomil Hrabak, predstavnik Instituta za historiju radničkog pokreta Hrvatske Leo Kobsa, predstavnik Instituta za zgodovino delavskega gibanja Slovenije Ferdo Fišer, predstavnik Instituta za nacionalna istorija Makedonije u Skoplju Rastislav Terzijevski.

Naučni skup su pozdravili: u ime Skupštine SR BiH potpredsjednik skupštine SR BiH Stojan Bjelajac, u ime Akademije nauka i umjetnosti BiH predsjednik Akademije prof. dr Branislav Đurđev, u ime Srpske akademije nauka u Beogradu i Jugoslavenske akademije znanosti i umjetnosti u Zagrebu prof. dr Vaso Čubrilović.

Zahvaljujući finansijskoj pomoći skupštine SR BiH, Institut za istoriju radničkog pokreta je u mogućnosti da objavi referate, saopštenja, kao i autorizovane diskusije u obliku u kojem su ih njihovi autori pripremili za štampu. U Institutu su stali na stanovište da se čitav materijal Naučnog skupa objavi u redovnoj publikaciji Instituta »Prilozi« u IV svesci, koja se na taj način pojavljuje u znaku naučnog obilježavanja velikog jubileja Republike Bosne i Hercegovine. Postupajući tako, redakcija »Priloga« pruža našoj javnosti, posebno naučnoj javnosti, mogućnost da upozna radove ovoga naučnog skupa,

koji kao i svaka naučna manifestacija ima svoje više domete, svoj prosjek, pa, razumije se, i svoje niže tačke. Naučna javnost, prije svega historiografska kritika treba da utvrdi naučni rezultat i doprinos Naučnog skupa u tretiranju njegove istorijske materije. Organizator naučnog skupa, autori podnesenih referata i saopštenja i redakcija »Priloga« će sa zahvalnošću primiti svako argumentovano mišljenje o Naučnom skupu uopšte i o njegovim pojedinim priložima posebno.

Osim materije naučnog skupa, u ovoj svesci »Priloga« objavljuju se i drugi naučni i stručni radovi, zatim prikazi, informacije i osvrti koji čine standardni sadržaj ove naše publikacije.